

四庫全書

集部

欽定四庫全書

集部

全蜀藝文志卷十七

詳校官內閣中書臣李采

侍讀臣孫球覆勘

總校官進士臣繆琪

校對官中書臣李荃

謄錄監生臣徐紹城

欽定四庫全書

全蜀藝文志卷十七

明 周復俊 編

詩

時序

仲春郊外

唐王勃

東園垂柳徑西堰落花津物色連三月風光絕四隣
鳥飛村覺曙魚戲水知春初晴山院裏何處染鷺塵

奉和鄭公軍城早秋

杜甫

秋風嫋嫋動高旌
玉帳分弓射虜營
已收滴博雲間戍
欲奪蓬婆雪外城

中秋夜聽歌聯句

武元衡

元衡在蜀淡于接物而開府極一時選公綽
為少尹正一觀察判官備度支判官裴度掌
書記盧士玫觀察支使李虛中觀察推官楊
嗣復節度推官

此夕來奔月何時去上天

備

雲鬢方自照玉腕更呈鮮

度
燕婉人間意
颺颺物外緣
公綽上相公
詩裁明月扇
歌索

想夫憐

元衡奉
盧侍郎

暗染荀香久
長隨楚夢偏

放
會當來彩

鳳髻鬢逐神仙

士致

早秋西亭宴徐員外

前人

鼎鉉辭台座
麾幢領益州
曲池連月曉
橫笛滿城秋
有
美皇華使
曾同白社遊
今來重相見
偏覺艷歌愁

競渡曲

僧鸞

五月五日天
晴明
楊花繞江啼
曉鶯使君未
出郡齋外

江上早聞齊和聲使君出時皆闕

馬前已被紅旗引

兩岸羅衣破鼻香銀釵照日如霜刃鼓聲三下紅旗開

兩龍躍出浮水來掉形幹波飛萬劍鼓聲劈浪鳴千雷

鼓聲漸急標將近兩龍

闕

目如瞬波上人呼霹靂驚

竿頭綵掛虹蜺暈前船搶水已得標後船失勢空揮撓

瘡眉血首爭不定輸岸一朋

闕

似燒只將輸贏

闕

賞

兩岸十舟互來往須臾戲罷各東西競脫文身請書上

吾今細觀競渡兒何殊當路權相持不思得所各休去

會到摧舟折檝時

蜀中春雨

鄭谷

海棠風外獨霑巾
襟袖無端惹蜀塵
和暖又逢挑菜日
寂寥未是探花人
不嫌蟻酒衝愁肺
却憶漁蓑覆病身
何事晚來微雨後
錦江春學曲江春

和蜀縣段明甫秋成望歸朝

錢起

製錦蜀江靜飛鳧
漢闕遙一茲風靡草
再視露盈條
旅望多愁思
秋天更次寥
河陽專麗藻
清韻入歌謠

蜀城春望

崔塗

天涯憔悴身一望一霑中在處有芳草滿城無故人懷
材皆得路失計獨傷春清鏡不忍照鬢毛應更新

好時節

元稹

身騎驄馬峩眉下面帶霜威卓氏前虛度東川好時節
酒樓元被蜀兒眠

成都遊樂詩

宋田況

四方咸傳蜀人好游娛無時予始亦信然之逮忝

命守益柅轅踰月卽及春游每與民共樂則作一
詩以紀其事自歲元徂景至止得古律長調短韻
共二十一章其間上元燈夕清明重九七夕歲至
之類又皆天下之所共豈曰無時哉傳之者過矣
蜀之士君子欲予詩聞于四方便知其俗故復序
以見懷

元日登安福寺塔

歲歷啟新元錦里春意早詰旦會朋家羣游僕鷗導像

塔峙中霄翬檐結重檠隨俗縱危步超若薄清昊千里
如指掌萬象可窮討野濶山勢迴寒餘林色老邀賞空
閭巷竭來喧稚耄人物事都閑車馬擁行道顧此懽娛
俗良慰羈遠抱第憂民政疎無庸答宸造

二日出城

初歲二之日言出東城闈縵騎隘重浮浙車空行塵原
野信滋腴景物爭光新青疇隱遙壩弱柳垂芳津邏卒
具威械祭墻列重茵俗尚各有時孝思情則均歸途喧

鼓鏡聚觀無富貧
坤隅地力狹百業常苦辛
設微行樂事何由裕
斯民守候其勉旃亦足彰吾仁

五日州南門蠶市

齊民聚百貨貿鬻貴及時
乘此耕桑前以助農績
資物品何其夥碎瑣皆不遺
編籥列箱筥飭木柄鎡鋸備用
誠為急舍器工曷施名花蘊天豔
靈藥昌壽祺根萌漸開發
藁載相參差游人銜識賞善價求珍
竒子真徇俗者行觀亦忘疲
日暮宴觴罷衆皆云適宜

上元燈夕

予嘗觀四方無不樂嬉游惟茲全蜀區民物繁它州春
宵寶燈燃錦里煙香浮連城悉奔鶩千里窮邊陬粉裊
合繡袂軋軋馳香輶人聲震雷遠火樹華星稠鼓吹匝
地喧月光斜漢流懽多無永漏坐久凭高樓民心感上
恩釋唄歌神猷齊音祝東北帝壽長嵩丘

二十三日聖壽前蠶市

龍斷爭趨利仁園敞邃經深年儲百貨有意享千金器

用先農事人聲混樂音蠶叢故祠在致祝順民心

二十八日謁生祿祠遊淨衆寺

千騎出重闈嚴祠淨宇鄰映林沽酒旆迎馬獻花人
日披江霧香颺起路塵韶華特明媚不似遠方春

二月二日游江會寶歷寺

昔日張復之詠字也來乘冠亂餘三春雖宴賞四野猶艱

虞遂移踏青會登舟恣游娛戎備漸解弛人情悉安舒
垂茲五十年材哲不敢踰愚來再更朔遽及仲春初綵

旆列城隈畫船滿江隅輕橈下奔瀨縱轡臨精廬因思
賢守事所作民恬愉慈惠至今存遺愛其忘諸

八日大慈寺前蠶市

蜀雖云樂土民勤過四方寸壤不容隙僅能充歲糧間
或容情爛曷能備凶痒所以農桑具市易時相望野氓
集廣鄺衆賈趨寶坊悃本誠急務戒其靡愆常茲會良
足喜後賢無忽忘

寒食出城

郊外融和景濃於城市中歌聲留客醉花意盡春紅遊
人一何樂歸馭莫忽忽

開西園

春風寒食節夜雨晝晴天日氣薰花色韶光徧錦川臨
流飛鑿落倚榭立鞦韆檻外游人滿林間飲帳鮮衆音
方雜沓餘景更留連座客無辭醉芳菲又一年

三月三日登學射山

麗日照芳春良會重元巳陽濱修禊除華林程射技所

尚或不同知俗亦足喜門外盛車徒山半列鄜市彩棚
飛鏑遠醉席歌聲起回頭望城郭煙靄相表裏秀色滿
郊原遙景落川涘日倦意猶遠思餘情未已登高貴能
賦感物暢幽旨宜哉賢大夫由斯見材美

九日大慈寺前蠶市

高閣長廊門四開新晴市井絕纖埃老農肯信憂民意
又見笙歌入寺來

二十一日遊海雲山

春光澹蕩海雲清
滿路遊人語笑聲
自愧非才無異績
止隨風俗順民情

二月十四日大慈寺建乾元節道場

赤精流景鑠朱夏
向清和紺宇修祠
盛華封祝慶多替
裳千載遇鐘梵五
天歌遠俗尤熙泰
皇猷信不頗

乾元節

感帝開鴻緒薰風
正阜生億年逢景
運萬國贊升平瑞
靄承龍闕晨曦啟
鳳城臚賓趨陸城
樂佾備韶英譯導

來珍貢醑懽洽頌聲曼齡均慶祝闔澤慰羣情地有捫
參遠人懷就日誠願將民共樂聊以報皇明

四月十九日汎浣花谿

浣花谿上春風後節物正宜行樂時十里綺羅青蓋密
萬家歌吹綠楊垂畫船疊鼓臨芳渚綵閣凌波汎羽卮
霞景漸曛歸櫂促滿城懽醉待旌旗

伏日會江瀆池

長空赤日真可畏三庚遇火氣伏藏溫風澳忍鬱不開

流背汗浹思清涼江瀆祠前有流水灌注蓄泄為池塘
沈沈隆厦壓平岸好樹蔭亞芙蓉香登舟命酒賓朋集
莫辭卮酒宜滿觴絲竹聒耳非自樂肆望觀者如堵墻
吾儕未能免俗累近日頗困炎景長今晨縱游不覺暮
形為外役暑亦忘豈如高齋滌百慮危坐自造逍遙鄉

七月六日晚登大慈寺閣觀夜市

萬里銀潢貫紫虛橋邊螭轡待星球年年巧若從人乞
未省靈恩徧得無

七月十八日大慈寺觀施孟蘭盆

飛閣穹隆軼翠煙孟蘭盛會衆喧闐且欣酷暑從茲減

漸有涼風快夕眠

京洛間俗言過孟蘭盆則暑退

重陽日州南門藥市

岷峨磅礴天西南靈滋秀氣中潛含草木瓌富百藥具
山民采捋知辛甘成都府門重陽市遠近湊集爭齎擔
市人譎獍亦射利頗覺良惡相追叅旁觀有叟意氣古
肌面肝煦毛鬢鬢賣藥數種人罕識單衣結縷和陰嵐

成都處士足傳記觀誠之外多奇談盛言每歲重陽市
神仙往往臨塵凡愚人妄意覬非分不識妙理徒癡貪
惟期徼倖化金術未肯授足棲雲岩吁嗟神仙無所求
一離常道非所耽但喜山民藥貨售歸助農業增康安

冬至朝拜天慶觀會聖慈寺

景至履佳辰朝祖著國令黃道啟潜萌紫宇晨蔭映陽
德比君子吾道實可慶矧丁皇運亨遇主充舜聖坤維
最遠方拙者此尸政雅俗舊儒文民牒少訟爭幸足宣

上恩惟恐盡物性良時不易得行樂未為併高會縱嬉
遨豐歲愈繁盛與衆助懽欣寄情于俚詠

次韻和季長學士正月二十八日出郊見寄之

什

宋祁

雅俗傳祠日

州人以二十八日祠保壽侯及唐杜丞相

年華重宴辰初陽

澹江霧小雨破街塵

是日雨而不澹游入皆集

客蓋浮輕吹齋刀

儼後陳林芳催兔目原色換龍鱗壤路歌聲雜構倡舞

疊新持盃徧酬客惟欠眼中人

九日宴射

前人

佳節憑高駐綵旗
亭臯霧罷轉晨曦
朔間羽集號猿後
臺外塵飛戲馬時
芳菊治疴爭汎藥
丹萸辟惡徧傳枝
明年此會知何處
醉玉顏山不用辭

十日宴江瀆亭

節去懽猶在
賓來賞更延
暝曦初短日
淒緊乍寒天
霽沼元非漲
秋花自少妍
蟻留新獻酎
蕙續漸殘煙
戲鯉衝餘藻
游龜避折蓮
流芳真可惜
從此遂凋年

九日藥市作

前人

陽九協嘉辰期人始多暇藥物會廣塵游肩閑相駕靈
品羅賈區仙芬冒閣舍擷露來山阿斲煙去巖罅係道
襟提携盈檐更薦藉乘時物無賤貧乏利能射通苓互
作主參桂交相假音架曹植謹贖令韓康無二價西南歲
多癘卑濕連春夏佳劑止刀圭千金厚相謝刺史主求
瘼萬室繫吾化顧賴慈石功捫衿重慙惜

七夕

范鎮

翠幕瑤梯百尺樓樓前星斗自悠悠
天家仙會能多少
未到平明已別愁

踏青

梅摯

綺場紛紛十里賒望中煙景半春華
人遊寶歷青絲騎
路隘土橋金犢車綠襯鳳頭垂
選草紅攢鷓首照汀花
夕陽敲鐙餘歡在
不惜鸛裘泥酒家

自和

前人

龜堞春遊徑路賒青青踏去冒煙華
翠停舴艋客尋寺

紅卸接羅人上車亭落五重沽卓酒釵行十二步潘花
乘歡醉盡高陽侶倒戴歸來不認家

鹿鳴燕

范成大

岷峩鍾秀蜀多珍坐上儒冠更逸羣墨沼不憂經覆瓿
琴臺重有賦凌雲文章小技聊干祿道學初心擬致君
富貴功名今發軔願看稽古策高勳

三月二日北門馬上

前人

新街如拭過鳴騶芍藥醠醠競滿頭十里珠簾都卷上

少城風物似揚州

游海雲寺唱和詩

吳中復

成都風俗歲以三月二十一日遊城東海雲
寺摸石於池中以為求子之祥太守出郊建
高旗鳴笳鼓作馳騎之戲大饗賓從以土民
樂觀者夾道百重飛葢蔽山野譙謳嬉笑之
聲雖田野間如市井其盛如此勃海只公下
車暮月簡肅無事從俗高會于海雲酒既中

顧謂寮屬曰一觴一詠古人之樂事也首作
七言詩以寫勝賞席客亦有以詩獻者更相
酬和得若干篇廼命幕下吏會稽王霽為
之字霽斐薄愧不能文勉從公命夫俳倡
絃竹其樂外也吟詠情性其樂內也充諸內
則能遺外之樂流于外則內有所喪今公既
推內之樂以樂賓又盡外之樂以樂民可謂
得其樂矣

錦里風光勝別州
海雲寺枕碧江頭
連郊瑞麥青黃秀
遶路鳴泉深淺流
彩石池邊成故事
茂林坡上憶前遊

予昔常陪樞
密田公遊此

綠尊好伴衰翁醉
十日殘春不少留

和韻

范純仁

東郊行樂冠西州
古寺峇堯占上頭
化俗文翁傳愷悌
尋山謝傅繼風流
天涯罇酒欣相遇
劍外三春得共遊
雅興直須窮勝賞
年光難使隙駒留

和韻

勾士良

佛土依山福遠州春行繡騎上雲頭補天彩石盈池在
朝海清江統寺流四國仰煩邨伯勞羣生翹望謝安遊
早知為礪為霖意惟有西民欲暫留

夔冬暖雪不到地唯山高處盡白它皆霏雨而

已

宋肇

密下斜飛片片愁不堪飄泊向西州思家對雪誠何味
只與羣山鬪白頭

晚晴

前人

古道遙臨水荒城早閉門亂山啣落照歸鳥下空
園江口漁人舫崖腰桑樹村客愁何可奈有酒莫
空樽

中秋對月用昌黎先生贈張功曹韻

前人

水精為鑑金為波挂空影寫山與河清光此夜十分好
有酒有客宜高歌去年今日行役苦若宿溪邊宿逢雨
傳聞蜀道如天高崖壁絕哀猿號波橫劒戟不易上

陸有虎豹何由逃江山舊恃白帝險風俗猶帶烏蠻操
驅馳兩月到西塞夢寐萬里還東臯嗅梅踏雪巴子里
路入鬼門欣不死飛飛倦鳥惟思還玉筍豈是鹿官班
餘生但願閒及酒虛名寧顧觸與蠻良宵佳客十有五
雲放月入樽壘間頽然老子興不淺韓詩坡句聊追攀
君不見天寶霓裳羽衣歌人間樂舞難同科遺音猶在
悲涼多有酒且歌遑恤他不飲如此良夜何

上巳從史巫山禊飲江臯

李璣

風沙一夕卷冥冥
晚色瞳矇上翠屏
薄宦驅人成老大
佳時得酒慰飄零
紅餘晚樹迷幽谷
綠漲晴波失遠汀
却是崇山兼峻嶺
看來渾不減蘭亭

踏磧

張晉

夔國先年有舊風
來看踏磧莫匆匆
只緣歲稔民康樂
纔到春初氣鬱葱
生怕背藍挨舞袖
不妨腰鼓鬧歌鐘
元戎小隊臨江許
要與遺黎一笑同

次韻

宇文紹莊

八陣圖前凜古風武侯英烈豈忽忽江流千載長嗚咽
山插孤雲亦蒨葱陡覺新春忘病思喜陪高論自情鍾
典刑前輩今能幾歲晚相期華髮同

次韻

費士綫

寶釧金釵盛峽風遶頭爭逐去忽忽旗標陣磧規模古
筵挹晴嵐氣色葱宜有明珠酬白璧空慚瓦缶間黃鐘
紛紛雲片呈佳瑞一飽端知萬姓同

官舍苦雨

黃人傑

漫空數日雨傾盆老屋淋漓瓦縫穿七月不虛為巧月
今年賴得是豐年泥塗滑滑妨行客煙隴陰陰礙種田
我欲乘風干造化盡披雲霧覩青天

上元竹枝歌和曾大卿

冉居常

青春惱人思跣躑女郎市酒趣數錢不道翁家久留客
紅襦慢結賽鞦韆

學簫學鼓少年羣準擬春來奉使君自向瑀籠作行隊
愛排好曲薦慙慙

珍珠絡結繡衣裳家住江南山後鄉聞道使君重行樂
爭携腰鼓趁年光

元宵

彭永

巴人最重上元時老穉相携看點詩行樂歸來天向晚
道傍聞得喚蠶絲

全蜀藝文志卷十七

欽定四庫全書

全蜀藝文志卷十八

明 周復俊 編

詩

題詠上

石硯

唐杜甫

平公今詩伯秀發吾所羨奉使三峽中長嘯得石硯巨
璞禹鑿餘異狀君獨見其滑乃波濤其光或雷電聯坳
各盡墨多水遙隱見揮洒容數人十手可對面比公頭

上冠正質未為賤當公賦佳句况得終清宴公含起草
姿不遠明光殿致於丹青地知汝隨顧盼

夔硯

宋王十朋

有以硯來售者曰歙石璞稍巨青色而文細
光潤而發墨兒曹買之或曰非歙硯也乃忠
萬石耳予莫能辨得之於夔因曰夔硯因讀
少陵平公得硯詩則知三峡古亦出佳硯也
詩以記之

一片夔州硯千年禹鑿痕平公見爾祖王子得其孫銅
雀今安有羅文世所尊聊同玄穎華文字與吾論

石笋行

杜甫

君不見益州城西門陌上石笋雙高蹲古來相傳是海
眼苔蘚蝕盡波濤痕雨多往往得瑟瑟此事恍惚難明
論是恐昔時卿相墓立石為表今仍存惜哉俗態好蒙
蔽亦如小臣媚至尊政化錯迂夫大體坐看傾危受厚
恩嗟爾石笋擅虛名後生未識猶駭奔安得壯士擲天

外使人不疑見本根

注云成都子城西金容坊有石二株挺然聳
峭高丈餘者舊傳云其名有六曰石笋曰蜀
妃闕曰沈犀石曰魚鳥仙壇曰四海之眼曰
五丁石門皆非也圖經云乃前寺之遺址諸
葛亮掘之方驗有篆字曰蠶叢氏故國誓蜀
之碑以二石柱橫埋連接鐵其中一南一北
無所偏邪又五字濁歇燭觸蠲時人莫曉蜀

相范賢議曰亥子歲濁字可記壬水寅卯
歲歎字可記壬饑饉己午歲燭字可記壬火
災辰戌歲觸字可記壬兵災申酉歲蠲字可
記壬稼穡富贍悉以年事推應符響

梅雨

前人

南京犀浦道四月熟黃梅湛湛長江去冥冥細雨來茅
茨疎易濕雲霧密難開竟日蛟龍喜盤渦與岸回

江頭五詠

前人

丁香

丁香體柔弱亂結枝猶墊細葉帶浮毛
疎花披素豔深栽小齋後庶近幽人占
晚墮蘭麝中休懷粉身念

麗春

百草競春華麗春應最勝少須好顏色
多漫枝條刺紛紛桃李枝處處總能移
如何貴此種却怕有人知

梔子

梔子比衆木人間誠未多於身色有用
與道氣傷和紅

取風霜實青看雨露柯無情移得汝貴在映江波

鷓鴣

故使籠寬織須知動損毛看雲莫恨望失水任呼號六
翮曾經翦孤飛罕未高且無鷹隼慮留滯莫辭勞

花鴨

花鴨無泥滓階前每緩行羽毛知獨立黑白太分明不
覺羣心妬休牽衆眼驚稻梁露汝在作意莫先鳴

題巴州光福寺柵木

見唐詩
紀事

嚴武

楚江長流對楚寺楠木幽生赤崖背臨溪挿石盤老根
苔色青蒼山雨痕高枝開葉鳥不度半掩白雲朝與暮
香殿蕭條轉密陰花龕滴澀垂清露聞道偏多越水頭
煙生霧歛使人愁月明忽憶湘川夜猿叫還思鄂渚秋
看君幽靄幾千丈寂寞窮山今遇賞亦知鐘梵報黃昏
猶臥禪床戀竒響

中秋夜錦樓望月

武元衡

玉輪初滿空迴出錦城東相向秦樓鏡分飛碣石鴻桂

香隨窈窕珠綴隔玲瓏不及前秋見團圓鳳沼中

同前得清字

王良會

德星搖此夜珥月滿重城杳靄煙雲色颺颺砧杵聲令
行秋氣爽樂感秋風輕共賞千年聖長歌四海清

同前得濃字

柳公綽

此夜年年月偏宜此地逢近看江水淺遙辨雪山重萬
井金花肅千林玉露濃不唯樓上思飛蓋亦陪從

同前得蒼字

張正一

高秋今夜月皓色正蒼蒼遠水澄如練孤鴻迴帶霜旅
人方積思繁宿稍沈光朱檻叨陪賞尤宜清漏長

同前得來字

徐放

玉露中秋夜金波碧落開鵲驚初泛濫鴻思共徘徊遠
月清光徧萬空爽氣來此時陪永望更得上燕臺

同前得前字秋字二篇

前人

清景同千里寒光盡一年竟天多鴈過通夕少人眠照
別江樓上添愁野帳前隋侯恩未報猶有夜珠圓

四時皆有月此夜獨當秋
照耀初含露徘徊正滿樓
遙連雪山淨迴入錦江流
願以清光末年年許從遊

浪淘沙

劉禹錫

濯錦江邊兩岸花
春風吹浪正淘沙
女郎剪下鴛鴦錦
將向中流匹晚霞

織錦曲

王建

大女身為織錦戶
名在縣家供進簿
長頭起樣呈作官
聞道官家中苦難回
花側葉與人別
唯恐秋天絲線乾

紅樓歲綈紫茸軟蝶飛參差花宛轉一梭聲盡復一梭
玉腕不停羅袖卷窗中夜久睡髻偏橫釵欲墜垂著肩
合衣臥時參沒後停燈起在鷄鳴前一疋千金亦不賣
限日未成官裏怪錦江水涸貢轉多宮中盡著單絲羅
莫言山積無盡日百尺高樓一曲歌

錦二首

鄭谷

布素豪家定不看若無文彩入時難紅迷天子帆邊日
紫奪星郎帳外蘭春水濯來雲鴈活夜機挑處雨燈寒

舞衣轉轉求新樣不問亂離桑柘殘

文君手裏曙霞生美號仍聞借蜀城奪得始知袍更貴
著歸方覺畫偏榮宮花顏色開時麗池鳳毛衣浴後明
禮部郎官人所重省中別占好窠名

擢第後入蜀經羅村路見海棠盛開偶題

前人

上國休誇紅杏豔深溪自照綠苔磯一枝低帶流鶯睡
教片狂和舞蝶飛堪恨路長移不得可無人與畫將歸

手中已有新春桂多謝煙香更入衣

海棠

前人

春風用意勻顏色銷得携觴與賦詩濃麗最宜新著雨
嬌婉全在欲開時莫愁粉黛臨窗懶梁廣丹青點筆遲
朝醉暮吟看不足羨他蝴蝶宿深枝

詠海棠

前人

濃淡方春滿蜀鄉半隨風雨斷鶯腸浣花溪上堪惆悵

子美無心為發揚

杜工部老於西蜀詩
集中無海棠之題

倚檻大慈寺樓咏落葉

侯繼圖

拭翠斂悲蛾為鬱心中事
搦管下庭除書成相思字
此字不書石此字不書紙
書向秋葉上願逐秋風起
天下負心人盡解相思死

木蓮樹生巴峽山谷間巴民亦呼為黃心樹大者高五丈涉冬不凋身如青楊有白文葉如桂厚大無脊花如蓮香色豔膩皆同獨房蓋有異四月初始開自開迨謝僅二十日忠州

西北十里有鳴玉溪生者穠茂尤異元和十
四年夏命道士毋丘元忠志寫惜其遐僻因

題三絕句云

白居易

如折芙蓉栽旱地似拋芍藥掛高枝雲埋水隔無人識
惟有南賓太守知

紅似胭脂膩如粉傷心好物不須臾山中風起無時節
明月重來得在無

已愁花落荒巖底復恨根生亂石間幾度欲移移不得

天教拋擲在深山

山石榴寄元九

前人

山石榴一名山躑躅一名杜鵑花

杜鵑啼時花撲撲九江三月杜鵑來一聲催得一枝開
江城上佐閒無事山下斲得廳前栽爛漫一欄十八樹
根株有數花無數千房萬葉一時新嫩紫殷紅鮮麴塵
淚痕裊損燕脂臉剪刀裁破紅綃中謫仙初墮愁在世
姹女新嫁嬌泥去聲春日射血珠將滴地風翻火焰欲燒

人間折兩枝持在手細看不似人間有花中此物似西
施芙蓉芍藥皆嫫母奇芳絕豔別者誰通州遷客元拾
遺拾遺初貶江陵去去時正值青春暮商山秦嶺愁殺
君山石榴花紅夾路題詩報我何所云若云色似石榴
裙當時襲畔唯思我今日欄前只憶君憶君不見坐銷
落日西風起紅紛紛

紫躑躅

元稹

紫躑躅滅紫攏裙倚山腹文君新寡乍歸來羞怨春風

不能哭我從相識便相憐似是花叢不迴目去年春別
湘水頭今年夏見青山曲迢迢遠在青山上山高水濶
難容足願為朝日早相暎願作輕風暗相觸爾躑躅我
向通州爾幽獨可憐今夜宿青山何年却向青山宿山
花漸暗月漸明月照空山滿山綠山空月午夜無人何
處知我顏如玉

山枇杷

山枇杷花似牡丹殷潑血往年乘傳過青山正值山花

好時節壓枝凝豔已全開映葉香苞纔半裂緊搏紅
袖欲支頤慢解絳囊初破結金線叢飄繁蕊亂珊瑚朶
重纖莖折因風旋落裙片飛帶日斜看目精熱亞水依
岩半傾倒籠雲隱霧多愁絕綠珠語盡身欲投漢武眼
穿神漸滅穠姿秀色人皆愛怨態羞容我偏別說向閒
人人不聽曾向樂天時一說昨來谷口先相問及到山
前已消歇左降通州十日遲又與幽花一年別山枇杷
爾託深山何太拙天高萬里看不清帝在九重聲不徹

園中杏樹良人醉陌上柳枝年少折因爾幽芳喻昔賢
磻溪冷坐權門咽

門前柳

崔珏

門前蜀柳

關

知春風澹煖煙愁殺人將謂只栽郡樓下

不知迤邐連南津南津柳色連南

一作
漢

市南去戎州三

百里夷隩蠻落相連接故鄉莫道心先死我今帝里還
有家門前嫩柳挿仙霞晨霑太乙壇邊雨暮宿鳳皇城
裏鷓別來三載當誰道門前年年綠陰好春來定解飛

雪花雨後還應庇烟草憶昔當年栽柳時新芽茁茁嫌
生遲如今宛轉稊著地常向綠陰勞夢思不道彼樹好
不道此樹惡試將此意問野人野人盡道生處樂為報門前
楊柳栽我應來歲當歸來縱令樹下能攀折白髮如絲
心似灰

武侯廟古柏

李商隱

蜀相階前柏龍蛇捧闕宮陰成外江畔老向惠陵東大
樹思馮異甘棠憶召公葉彫湘燕雨枝折海鵬風玉壘

經綸遠金刀，歷數終誰將。出師表一為問，昭融

題籌筆驛

前人

魚鳥猶疑畏簡書，風雲長為護儲胥。徒令上將揮神筆，
終見降王走傳車。管樂有才真不忝，關張無命欲何如。
他年錦里經祠廟，梁父吟成恨有餘。

題籌筆驛

薛逢

天地三分魏蜀吳，武侯崛起展訐謨。身依豪傑傾心術，
目對雲山演陣圖。赤伏運衰功莫就，皇綱力振命先殂。

出師表上留遺恨猶自千年激壯夫

題籌筆驛

羅隱

拋擲南陽為主憂北征東討盡良籌時來天地雖同力
運去英雄不自由千里山河輕孺子兩朝冠劍恨譙周
惟餘岩下多情水猶自年年傍驛流

題風箏

高駢

駢鎮蜀日以南詔侵暴築羅城四十里朝廷
雖加恩賞亦疑其固護忽一日聞奏樂聲知

有改移乃題風箏寄意旬日報到移鎮渚宮
夜靜絃聲響碧空宮商信任往來風依稀似曲才堪聽
又被移將別調中

西川座上聽金五雲唱歌

陳陶

蜀王殿上華筵開五雲歌從天上來滿堂羅綺悄無語
喉音止駐雲徘徊管絃金石還依轉不隨歌出靈和殿
白雪飄飄席上來貫珠歷歷聲中見舊樣釵篸淺澹衣
元和梳洗青黛眉低叢小髻膩髮髻碧牙鏤掌山參差

曲終暫起更衣過，還向南行座頭坐。眉低欲語謝貴侯，
檀臉雙雙淚穿破。自言本是宮中嬪，武皇改號承新恩。
中丞御史不足比，水殿一聲愁殺人。武皇鑄鼎登真籙，
嬪御蒙恩免幽辱。茂陵弓箭不得親，嫁與卑官到西蜀。
卑官到官年未周，衡祿罷官東西遊。蜀江水急駐不得，
復此萍蓬又十秋。今朝得侍王侯宴，不覺途中妾身賤。
願持卮酒更唱歌，歌是伊州第三遍。唱著右丞征戍詞，
更聞閨月添相思。如今聲韻尚如在，何況宮中年少時。

五雲五雲可憐許明朝道向囊中去須臾讌罷各東西
雨散雲飛莫知處

誌峽船具詩

并序

王周

峽上之船與下之船大抵觀浮葉而為之其
狀一也執而為用者或狀殊而用一或狀同
而名異皆有謂也下之船有檣有五兩有帆
所以使風也尾有拖傍有棚上者以其山曲
水急下有石皆不可用也狀直如舫前後各

一者謂之梢船之斜正歌側為船之司命者
梢類施其狀殊而船之便于事者悉不如梢
作梢詩桴槳橈棹拔使其進而無退利涉川
澤為船之陳力者桴幾槳類其狀同而異名
也在船有力悉不如桴作桴詩峽水湍浚激
石忽發者謂之潰沓湫而漩者謂之腦岸石壁
立潰之忽作篙力難制以其木之堅韌竿直
戟其首以竹納護之者謂之箴竹為綫而勾

其戩者謂之納為船之良輔者戩與篙狀殊
而用一也在船獨出悉不如戩作戩詩岸石
如齒非麻梟紉繩之為前牽取竹之筋者破
而用梟為紉以續之以備其牽者謂之百丈
繫其船首者謂之陽紉牽之者擊鼓以號令
之人聲灘亂無以相接所以節動止進退牽
之防礙者謂之下緯濟其不通為船之先進
者梟與竹狀殊而用一也在船先容悉不如

百丈作百丈詩噫古人觀物因事為誌者甚多也予祇命憲局訟訴已實抵瞿塘耳目熟於長年三老輩矣船具之於船有力者作詩以稱之庶幾魯望茶經者也俾系其末詩云

梢

制之居首尾俾之辨斜正首動尾聿隨斜取正為定有如提吏筆有如執持柄有如秉師律有如宣命令守彼方與直得其剛且勁既能濟險難何畏涉遼夏招招俾

作主汎汎實司命風烏愧斟酌畫鷁空輝映古人存豐
規猗歟聊引證

艣

用之大曰艣冠乎小者楫通津既能濟巨浸即橫涉身
之使者頰虎之拏者爪魚之撥者鬣弩之進者筴此實
為相須相須航一葉

戩

箭飛峽中水鋸立峽中石峽與水為隘水與石相擊瀆

為生險艱聲發甚霹靂三老航一葉百丈空千尺蒼黃
徒爾為倏忽何可測篙之小難制戩之獨有力倚嗟戩
之為彬彬堅且直有如用武人森森轟戈戟有如敢言
士落落吐胸臆拯危居坦夷濟險免兢惕彼哲匠心
俾其來者識

百丈

少嘗侍先君餘聞誦白氏始得入峽詩深味作詩旨云
有萬仞山云有千丈水自念坎壈時尤多兢慎理山束

峽如口水漱石如齒孤舟行其中薄米猶坦履孱顏屹
馬立洶涌勃然起百丈為前牽萬險即平砥破之以篲
簞續之以麻泉礪之堅似節引之直如矢杼袖連半空
長短隨兩涘鐵鎖枉馳名錦纜謾稱美長繩豈能繫朽
索何足擬苟非綰之為胡可力行此

金盤草詩

生寧江巫山
南陵林木中

前人

今春從南陵得草名金盤金盤有仁性生在林一端根

節歲一節

其根一年生一節人
採而服可解毒也

食之甘而酸風俗競採

掇俾人防急難巴中蛇虺毒解之如走九巨葉展六出
軟榦分長竿搖搖綠玉活裊裊香荷寒世云暑酷月鬱

有神物看

夏中採之則必有巨蛇衛足人即難採

天之產於此意欲生民

安今之為政者何不反此觀知彼苛且猛慎勿虐而殘
一物苟失所萬金惟可嘆莫並蒿與萊豈羨芝及蘭勤
渠護根本栽植當庭欄寄言好生者休說神仙丹

露青竹杖歌

顧况

鮮于仲通正當年章仇兼瓊在蜀川約束蜀兒採馬鞭

蜀兒採鞭不敢眠橫截斜飛飛鳥邊繩橋夜上層崖巔
頭挿白雲跨飛泉採得馬鞭長且堅浮漚丁子珠聯聯
灰煮蠟揩光爛然章仇兼瓊持上天上天雨露何具偏
飛龍閑廐馬數千朝飲吳江夕秣燕紅塵撲轡汗濕韉
獅子麒麟聊比肩曲江昆明洗刷牽四蹄踏浪頭杵天
蛟龍稽顙河伯虔拓羯胡鷄脚手鮮陳閔韓幹丹青妍
欲貌未貌眼欲穿金鞍玉勒錦連乾騎入桃花楊柳煙
十二樓中奏管絃樓中美人奪神仙爭愛大家把此鞭

祿山入關關破年忽見揚州北邙前祇有人還千一錢
亭亭筆直無皺節磨將形相一條鐵市頭終是無人別
江海賤臣不拘綆垂鞘挂影西窗缺稚子覓衣挑仰穴
家童拾薪幾拗折玉潤猶露玉壘雪碧鮮似染萇弘血
蜀帝祠邊子規咽相如橋上文君絕往年策馬降至尊
七盤九折橫劒門穆王八駿超崑崙安用冉冉孤生根
聖人不貴難得貨金玉珊瑚誰買恩

竹枝 九首

劉禹錫

白帝城頭春草生
白鹽山下蜀江清
南人上來歌一曲
北人莫上動鄉情

山桃紅花滿上頭
蜀江春水拍山流
花紅易衰似郎意
水流無限似儂愁

江上春來新雨晴
灑西春水縠紋生
橋東橋西好楊柳
人來人去唱歌行

日出三竿春霧消
江頭蜀客駐蘭橈
憑寄狂夫書一紙
住在成都萬里橋

兩岸山花似雪開
家家春酒滿銀杯
昭君村中多女伴
永安宮外踏青來

城西門前濫灑堆
年年波浪不能摧
懊惱人心不如石
少時東去復西來

瞿塘嘈嘈十二灘
此中道路古來難
長恨人心不如水
等閒平地起波瀾

巫峽蒼蒼烟雨時
青猿啼在最高枝
箇裏行人腸自斷
由來不是此聲悲

山上層層桃李花
雲間煙火是人家
銀釧金釵來負水
長刀短笠去燒畬

竹枝

白居易

瞿塘峽口水煙低
白帝城頭月向西
唱到竹枝聲咽處
寒猿暗鳥一時啼

竹枝苦怨怨何人
夜靜山空歌又聞
蠻兒巴女齊聲唱
愁殺江樓病使君

巴東船舫上巴西
波面風生雨脚齊
水蓼冷花紅簇簇

江籬濕葉碧萋萋

江畔誰人唱竹枝
前聲斷咽後聲遲
怪來調苦緣詞苦
多是通州司馬詩

竹枝

孫光憲

門前春水白蘋花
岸上無人小艇斜
商女經過江欲暮
撒拋殘食飼神鴉


亂繩寸結絆人深
越羅萬丈表長尋
楊柳在身垂意緒
藕花落盡見蓮心

巫山竹枝二首

宋李羣

封崇嶺上細腰宮
遺老相傳祭鬻熊
一炬牧兒今底處
千年青草長春風

陽臺門前六律山
女郎吹笛翠微間
日斜酒散同歸去
笑插花枝滿髻鬟



全蜀藝文志卷十八

欽定四庫全書

集部

全蜀藝文志卷十九

二十九

詳校官內閣中書_臣李采

侍讀_臣孫球覆勘

總校官進士_臣繆琪

校對官中書_臣李荃

謄錄監生_臣徐紹城

欽定四庫全書

全蜀藝文志卷十九

明 周復俊 編

詩

題詠下

竹枝

宋蘇軾

竹枝歌上楚聲幽怨惻怛若有所深悲者豈
亦往昔之所見有足怨者歎夫傷二妃而哀
屈原思懷王而憐項羽此亦楚人之意相傳

而然者且其山川風俗鄙野勤苦之態固已見於前人之作與今子由之詩故特緣楚人疇昔之意為一篇九章以補其所未道者

蒼梧山高湘水深中原北望度千岑帝子南遊飄不返
唯有蒼蒼楓桂林楓葉蕭蕭桂葉碧萬里遠來超莫及
乘龍上天去無蹤草木無情空寄泣水濱擊鼓何喧闐
相將叩水求屈原屈原死已今千載滿船哀唱似當年
海濱長鯨徑千尺食人為糧安可入招君不歸海水深

海魚豈解哀忠直吁嗟忠直死無人可惜懷王西入秦
秦關已閉無歸日章華不復見車輪君王去時簫鼓咽
父老送君車軸折千里逃歸迷故鄉南公哀痛彈長鈇
三戶亡秦信不虛一朝兵起盡謹呼當時項羽年最少
提劍本是耕田夫橫行天下意何事棄馬烏江馬垂涕
項王已死無故人首入漢庭身委地富貴榮華豈足多
至今唯有塚嵯峨故國淒涼人事改楚鄉千里為悲歌

竹枝

蘇轍

舟行千里不至楚忽聞竹枝皆楚語楚言啁哳安可分
江中明月多風露扁舟日落駐平沙茅屋竹籬三四家
連春並汲各無語齊唱竹枝如有嗟可憐楚人足悲訴
歲樂年豐爾何苦釣魚長江江水深耕田種麥畏狼虎
俚人風俗非中原處子不嫁如等閒雙鬟垂頂髮已白
負水採薪長苦艱上山採薪多荆棘負水入溪波浪黑
天寒斫木手坼龜水重還家足無力山深瘴暖霜露乾
夜長無衣猶苦寒平生有似麋與鹿一旦白髮已百年

江上乘舟何處客
列肆喧嘩占平磧
遠來忽去不記州
罷市歸船不相識
去家千里未能歸
忽聽長歌皆慘悽
空船獨宿無與語
月滿長江歸路迷
路迷鄉思渺何極
長怨歌聲苦淒急
不知歌者樂與悲
遠客乍聞皆掩泣

巴女謠

唐于鵠

巴女騎牛唱竹枝
藕絲菱葉傍江時
不愁日暮還家錯
記得芭蕉出槿籬

蜀賤

宋文彥博

素牋明潤如溫玉新樣翻傳號冷金遠寄南都豈無意
緣公揮翰似山陰

萬蝶花

宋蘇轍

誰唱殘春蝶戀花一團粉翅壓枝斜美人欲向釵頭插
又怨驚飛髻似鴉

蜀地海棠

前人

蜀國天餘煦珍葩地所宜濃芳不隱葉併豔欲然枝
影分羣萼均霞點萬蕤回文錦成後夾煎燎烘時蜂蕊

迎銜密鶯梢向坐危淺深雙絕態啼笑兩妍姿絳節排
煙竦丹釭落帶垂童容郵畏薄使面到憂遲媚日能徐
照暄風肯遽吹蜀少疾風故華愈感惜歡當晚晚留恨付離披麗
極都無比繁多僅自持損香饒麝柏照影次瑤池畫要
精侔色歌須巧騁辭舉尊頻語客細摘玩芳期

英韶在前徒矜下里之曲風雅未喪豈繁繁轅
之音不圖綴綺靡之辭抑將導敦厚之音耳
海棠雖盛於蜀人不甚貴因暇偶成五言百

韻律詩一章四韻詩一章附于卷末知我者

無加誚焉

沈立

岷蜀地千里海棠花獨妍萬株佳麗國二月豔陽天
叢萼勻如布修蕤巧似編彤雲輕點綴赤玉碎雕鐫
瑟瑟光輸瑩猩猩血借鮮淺深相向背疎密遞勾牽
輕萼重重染丹砂細細研蕊纖金粟拱鬢嫩紫絲拳
紅蠟隨英滴明璣著穎穿初莖爭袅娜翹榦共踟躕
絕代知無價生香不減殘分靈應桂苑鍾粹定星躔

木帝經邦相花王入室賢祥飈加剪拂卿霤共陶甄
真宰陰推轂勺芒與著鞭不須憂薄命好為惜流年
贊翼施生柄扶持煦嫗權主張韶令止調燮淑威宣
和氣高低洽芳心次第還金釵人十二珠履客三千
雲雨迷巫峽風波怨洛川娉婷宜住楚妖冶合居燕
綉被通宵展華燈徹曙然橫披前檻外半出假山巔
暗羨遊蜂採偷輸蟻穴沿瘦嫌蛛網織帚怯女蘿纏
蓄恨憑誰訊無言只自憐文君酒鑪畔揚子草堂前

品格生來別風流到老全繁中生悵望衆裏見喧閑
暄暖精神出精明意態便關關鶯對語兩兩燕高鶩
天上宜封殖人間偶佇延共櫻園別館與杏攤斜阡
清暖簾爭卷黃昏幕尚褰低籠金鞦韆高映畫鞦韆
忽認梁園妓深疑閨苑仙忽忽來蔥圃遠遠別芝田
羞隱暝濛霧輕如淡蕩煙乍逢開羽扇初喜下雲軒
髻髻回星鬢依稀帶翠鈿五銖衣宛轉七寶帳翩翩
獨立挨霓節成行列彩旃因宜欵虎枕步好觀金蓮舞

定休回袖粧濃不傅鉛蓋張松鬱鬱茵藉草芊芊馥郁
蘭供夢扶疎柳伴眠軀輕彌綽約腰細更便嬛姪姘常
顯若幽柔自洒然侍兒羅白芷婢子列芳荃口口濃檀
注腮腮薄粉填解圍施葉幄買笑有榆錢倚旒環瑶席
婆婆匝玳筵嬌依屏曲曲泣對露涓涓南陌輕埃蔽東
郊夕照連幾時休縹渺從此識嬋娟是處遺簪珥誰家
不管絃妬姬貪恐失戲稚惜何顛折閃搔頭褪擎拏約
腕揎戴遮髮上鳳裝壓鬢邊蟬汲引新懽聚消磨宿忿

蠲縱觀須倒載命宴必加邊翻曲教歌媛更詞送酒船
鄉心須暫解病眼當時痊迢遞來油壁從容住錦鞵雅
宜交讓目穠與棣棠聯不憤叅朱槿寧甘混木綿醪醖
潛失色躑躅敢差肩紫柰思投迹天桃恥備負梧桐愧
金井芍藥濫花磚併壓辛夷俗還宜乙夜看天恩無久
恃人寵莫長專布影交三徑敷榮遍一塵凝眸方擘擘
迴首旋翩翩可忍驚飈挫胡須急景煎珊瑚隨手碎絳
雪繞枝旋拂漢霞初散當樓月自圓飄零隨蟻蠓散亂

逐漪漣灼灼龜城外亭亭錦水邊抱愁應慘蹙有淚即
潺湲午影迷蝴蝶朝寒怨杜鵑物情元倚伏人意莫拘
攣擢秀高羣木稱珍極八埏未開猶脉脉憂落固悄悄
別著新文紀重尋舊譜箋共知紅豔好誰辨赤心堅實
可陪朱李根宜灌醴泉栽須隣竹柏樹莫繞烏鳶如託
膏腴茂當隨富貴遷為多猶底滯因遠尚迤邐客思易
成亂心期未省愆畫思摩詰筆吟稱薛濤牋醉目休頻
送詩情豈易緣薛能誇麗句鄭谷賞佳篇止感芳姿美

那憐託地偏山經猶罕記方志未多傳巧詠憂才竭冥
搜得意填遐隙寡真賞僻境忍輕捐抽秘慚非據探奇
敢讓先援毫叙名卉聊用放懷焉

海棠

石延年

君看海棠格羣花品詎同嬌嬈情自富蕭散豔非窮舊
穀斑吳苑新羅碎蜀宮錦窠杯裏影繡段隙前烘心亂
香無數莖柔動滿叢意分巫峽雨腰細漢臺風盛若霞
舒卷鮮於血灑空高低千點赤深淺半開紅粧面朱纔

布膏唇檀乍融色焦無可壓體瘦不成豐枝重輕浮外
苞疎密鬧中難勝蜂不定易入蝶能通

答朱公綽牡丹詩

宋祁

珍蘂分清賞飛郵附翠籠蹄金點髻密璋玉鏤附紅香
惜持來遠春應摘後空玩詩仍把酒悵不與君同

新繁縣東湖瑞蓮歌

王益

火雲爍盡大幕醒水光弄碧涼無聲荷花千柄拂煙際
傑然秀幹駢天英天敕少昊偏滋榮宵寒仙露饒金莖

嫋嫋飄風起天末綠華璫珮來
琤琤觥觥式宴資擊賞
何人揆蒨飛筆精越國亭亭八
百里木蘭泛詠稱明媚
爭如錦水泝繁江孤根擢翠葩
分膩紫清合曜流霞暉
楚臺無夢朝雲飛韓虢佳人新
侍寵溫泉宮裏賜霞衣
赫赫曦陽在東井珍房萃作皇
家慶流火初晨復毓靈
連壁更疑唐傑盛眇觀熙政集
元和嘉穀重榮田野歌
高宗昔慶劉仁表五色卿雲世
其少我今取喻進德流
優哉祥蓮出池沼草萊泥滓俱
棄捐致君事業殊商皓

歸作臯夔稷禹臣同心一德翊華勳

和

梅摯

東湖已月湖水平鱗波暗織簫籟聲中有植蓮一萬本
紅漪相照擣繁英地靈氣粹不我測雙葩倏如同一莖
黃姑織女渡銀漢蛻旗鳳葆羅空青又認英皇立湘渚
翠華不返凝怨慕五十哀絃頓發聲駢首低昂泣珠露
是時主人集宴喜湖光浸筵霞脚膩朋簪峨峨盡才子
椽筆交輝雲蒸麗酒酣倚欄惜紅輝煙素徘徊縈不飛

魏宮甄后晝方寢髣髴有人持玉衣此邑古今無異政
室家瘡痍何由慶三年鼠竊例皆然以薪救火火彌盛
自公柅車政克和載途鼓腹騰謳歌公用心日皎皎
不獨于今古應少因感珍芳兩兩開玉貫珠聯開縣沼
况我與公高適道高歌詎襲高山皓嘉謀嘉猷思入陳
願將此美歸華勳

蜀牋一軸獻太傅同年葉兄 司馬光

西來萬里浣花牋舒卷雲霞照手鮮書笥久藏無可稱

願投詩客助新篇

望日與諸公會於大慈聞海雲山茶合江梅花
開遂相邀同賞雖無歌舞實有清歡因成拙

詩奉呈

前人

野寺山茶昨夜開江亭初報一枝梅旋邀座上逍遙客
同醉花前澹澹盃秀色霜濃方潤澤暗香風靜更徘徊
仙姿莫遣常情妬不帶東山妓女來

蜀花以狀元紅為第一金陵東御園紫繡毬為

最

范成大

西樓第一紅多葉東苑無雙紫壓枝夢裡東風忙裡過
蒲團藥鼎髻成絲

紫荷車

峽山此
藥甚多

前人

綠英吐弱線翠葉抱修莖
蠹如青旄節草中立亭亭根
有卻老藥鱗皺友松苓
長生不暇學聊冀病身輕

錦帶花

東南甚珍此花
峽中蔓生山谷

前人

妍紅棠棣粒弱綠薔薇枝
小風一再來飄飄隨舞衣
吳

下嫵芳檻峽中滿荒陂佳人墮空谷皎皎白駒詩

寶相花

前人

誰把柔條夾砌栽壓枝萬朶一時開為君也著詩收拾
題作西樓錦被堆

太平瑞聖花

前人

雪外捫參嶺烟中濯錦洲密攢文杏蕊高結綵雲毬百
世嘉名重三登瑞氣浮挽春同住夏看到火西流

垂絲海棠

前人

春工葉葉與絲絲怕日嫌風不自持
曉鏡為誰粧未辦
沁痕猶自宿胭脂

十一月十日海雲賞山茶

前人

門巷驩呼十里村臘前風物已知春
兩年池上經行處
萬里天邊未去人
客鬢花身俱歲晚
粧光酒色且時新
海雲橋下溪如鏡
休把冠巾照路塵

清明日試新火作牡丹會

蜀人以洛中千葉種
為京花單葉為川花

前人

再鑽巴火尚浮家去國年多客路賒那得青煙穿御柳
且將銀燭照京花香鬟半醉斜枝重病眼全昏瘴霧遮
錦地繡天春不散任教簷雨卷泥沙

謝人寄蒙頂新茶

文同

蜀土茶稱聖蒙山味獨珍靈根托高頂勝地發先春幾
樹驚初暖羣籃競摘新蒼條尋暗粒紫萼落輕鱗的皪
香瓊碎擊鬆綠蠶勻漫烘防熾炭重碾敵輕塵惠錫全
來蜀乾峭蓋自秦十分調雪粉一啜嚙雲津沃睡清無

夢清吟健有神冰霜疑入骨羽翼要騰身磊磊真賢宰
堂堂作主人玉川喉吻澁莫厭寄來頻

二色芙蓉

前人

蜀國芙蓉名二色重陽前後始盈枝畫調粉筆分粧處
繡引紅針間刺時落晚自憐窺露沼忍寒誰念倚霜籬
主人日有西園客得爾方於勸酒宜

孫知微畫

前人

太古奇偉士精思獨於畫馳心入茫昧萬物赴揮灑當

時一名重顧陸非爾亞卓哉青城筆妙絕冠天下寥寥
九天仗一一若神寫吾恐千載後是終無繼者

玉局洞石恪畫仙人四壁

喻汝礪

真人何年下紫清
目睛飄墮如流星
至今玉洞通窈冥
蕭然紫室之威靈
杖履而來六月望
赤臯裂石風淒冷
屹然四壁呀欲動
神怪夭矯目喪睛
道與之貌非丹青
馭風而行誰使令
雲飛電掣集帝所
超然得意皆天人
異哉石子偉丈夫
胸中磊磊怪所儲
元圃之山帝所居

子游具間墮雙鳧不然安知天上有此樂秃筆一掃凌
方壺細看毛骨分鎔鉢偉形傑狀人人殊古來列真誰
所摹前稱關仝後張圖近之豪者郭忠恕落筆拂處如
奔諸兩公軼蕩不拘束筆力磊砢相剗扶我來憑欄聊
一呼隨翁聯軒上清都

錦屏山暮景

前人

暝色輕煙罩郡城漁舟燈火倒觀星寒山遠水江村暮
自在粧成水墨屏

題龍岩寺石刻文與可墨竹

程士孫

風雨勞先別敢辭樽酒深一梢墻上竹留作歲寒心

同前

李元應

淺梢疎節任蕭郎正向祁寒敵曉霜清興未窮僧已老
自餘山色與溪長

蜀酒歌

陸游

漢州鶯黃鸞鳳雛不鷲不搏德有餘眉州玻璃天馬駒
出門已無萬里塗病夫少年夢清都曾賜虛皇碧琳腴

文德殿門晨奏書歸局黃封羅百壺十年流落狂不除
遍走人間尋酒壚青絲玉瓶到處酤鴛黃玻瓈一滴無
安得豪士致連車倒瓶不用盃與盃琵琶如雷聒坐隅
不愁渴死老相如

偶過浣花感舊遊戲作

前人

憶昔初為錦城客醉騎駿馬桃花色玉人携手上江樓
一笑鈎簾賞微雪寶釵換酒忽徑去三日樓中香未滅
市人不識呼酒仙異事驚傳一城說至今西壁餘小草

過眼年光如電掣正月錦江春水生花枝闕處小舟橫
閒倚胡床吹玉笛東風十里斷腸聲

浣花賞梅

前人

老子人間自在身挿梅不惜損烏巾春回積雪層冰裏
香動荒山野水濱帶月一枝低弄影背風千片遠隨人
石家樓上貪吹笛肯放朝朝玉樹新

蜀苑賞梅

前人

十里溫香撲馬來江頭還見去年梅喜開剝欲邀明月

愁落先教掃綠苔
跌宕放翁新醉墨
淒涼廢苑舊歌臺
盛衰自古無窮事
莫向昆明嘆劫灰

席上作

前人

綠波畫槳浣花船
清簟疎簾角黍筵
一幅葛巾林下客
百壺春酒飲中仙
散懷絲管繁華地
寄傲江湖浩蕩天
浮世升沈何足計
丹城碧落珥貂蟬

故蜀別苑在成都西南十五六里梅花至多有

兩大樹夭矯若龍相傳謂之梅龍予初至蜀

嘗為作詩自此歲常訪之今復賦此

前人

昔年曾賦西郊梅茫茫去日如飛埃即今衰病百事嬾
陳迹未忘猶一來蜀王故苑犁已遍散落尚有千雪堆
珠樓玉殿一夢破煙蕪牧笛遺民哀兩龍臥穩不飛去
鱗甲脫落生莓苔精神每遇雪月見氣力苦戰冰霜開
羈臣放士耿獨立淑姬靜女知誰媒摧傷雖多意愈厲
直與天地爭春回蒼然老氣壓桃杏笑我白髮心尚孩

微風故為作嫵媚一片吹入黃金壘

綿州錄事參軍廳觀楚公畫鷹少陵為作詩者

前人

我來訪古涪之濱不辭百固冀一真走馬朝尋海樓館
斫鱠夜醉魴魚津越王樓高亦已換俯仰今古堪悲辛
督郵官舍最早陋棟撓楹腐知幾春歸然此壁獨無恙
老槎勁翮完如新向來劫火何自免叱呵守護疑有神
妖狐九尾穴中國共置不問如越秦此時此物合致用

下鞬指呼端在人會當原野洒毛血坐令萬里清煙塵
老眼還憂不及見詩成肝膽空輪囷

龍掛

前人

成都六月天大風發屋動地聲勢雄黑雲崔嵬行風中
凜如鬼神塞虛空霹靂迸火射地紅上帝有命起伏龍
龍尾不卷曳天東壯哉雨點車軸同山灌水溢路不通
連根拔出千丈松未言為人作年豐偉觀一洗芥蒂胸

銅馬歌

王灼

郾城村民鑿古墓得銅馬高三尺許制作精
妙前簡池守景季淵取以歸風雨輒聞嘶聲
怪之不敢留移送佛寺紹興丙子予以事至

成都黃伯淵見索作銅馬歌

君不見武皇逸志凌九垓追風躡影思龍媒魯班門外
立銅馬天厩萬匹皆塵埃又不見伏波將軍破交賊歸
來殿前獻馬式據鞍習氣殊未衰想見老子真矍鑠兩
京翻覆知幾秋只有山河供客愁孤煙落日蠶叢國出

此神物於荒丘千年黃壤誰作主猶把歸心泣風雨但
恐一朝去無蹤有似豐城寶劍化雙龍

張飛刁斗

上有八分
飛所書也

張士瓌

天下英雄只豫州阿瞞不共戴天仇山河割據三分國
宇宙威名丈八矛江上祠堂嚴劔珮人間刁斗見銀鈎
空餘諸葛秦州表左袒何人復為劉

杜鵑

宋肇

暖雲無定半陰晴茅屋紙窗深復明喬木參天竹千莖

巴山欲曉風露清
杜鵑飛鳴遶江城
魚復四月江水生
林花落盡空含情
灤東灤西朝暮聲

次韻袁升之遊海雲寺鴻慶院山茶之作

蒲瀛

山茶兩本上連空
疊葉棲枝占佛宮
雀尾有金輸紺碧
鶴頭無火讓殷紅
優於峽茗稱呼異
劣與梅花氣候同
誰識諸天雨花外
道人宴坐雪霜中

梅林分韻詩

有序

杜謹言

紹興庚辰十二月既望縉雲馮時行從諸朋
舊凡十有五人携酒具出西梅林林本王建
梅花苑樹老其大可庇一畝中間風雨剝裂
仆地上屈盤如龍孫枝叢生直上尤怪古者
凡三四酒行以舊時愛酒陶彭澤今作梅花
樹下僧為韻分題賦詩客既占韻立者倚樹
行者環繞仰者承薌頰者拾英吟態不一皆
可圖畫是行也余被命造朝行事薄遽重以

大府衣冠謁報主人饋勞酬對奔馳形神為
之俱敝諸公導以斯遊江流如碧玉平野秀
潤竹塢桑疇連延彌望民家十五五籬落
鷄犬比閭相親不愁不嗟余散策其間蓋不
知向之疲荼厭苦所在也昔人謀于野則獲
閒暇清曠有爽於精神思慮游不可廢如此
哉又况所與游皆西州名俊憲事者即詩成
次第不以長少以所得韻之後先聯成軸客

十有五韻止十四呂義父別以詩字為韻又
有首眩詩不成者缺樹字一韵余過沉犀樊
允南監鎮稅語允南補之諸公又屬時行為
之序十五人者成都楊仲約施子一呂周輔
義父智父澤父宇文德潜呂默夫杜少訥房
仕成揚舜舉綿竹李無變潼川于伯永正法
寶印老縉雲馮當可

得舊字

竹村喜紆徐江雲迷昏晝踟躕馬上語嫩寒入衣袖天
公惜梅花破鵬開未就留以待君來春風本如舊一尊
既相屬勿辭作詩瘦明年用和羹請為使君壽

得時字

李流謙

巾冠墮城府桔槔無停時胸脾貯黃埃空慕林壑姿涎
流方外勝秦人望軒羲萬金買閒日駕言一舒眉冒踏
衆俊場更從百代師食魚得河魴熊踏佐其滋西林煙
雨村霜條出水獉鳥鵲噪寒暝玉立交參差置尊扶踈

下老幹虬蛟馳落葉不動塵初無犀駭鷄羞我木石資
關公瓊琚詞深酌起自勸滕莒吾封圻公行對宜溫雲
霧生攀躋能來玩墟落疋馬却蓋麾蟠胸萬蟠竦寰區
眇毫絲以茲接羣動白羽坐指撫笑彼秦外者組紱為
之鞿宅年駟馬還梅花當十圍識此黃公壚下車挽客
衣未覺邈山河一醉也大奇

得愛字

呂及之

去城十里南郊外突兀老梅餘十輩玉雪為骨冰為魂

氣象不與凡卉對我來窮冬煙雨晦臨風把酒從公酌人
言此實升廟堂埋沒荒村今幾歲清芳不為無人改捐氣
何妨本根在瑰章妙語今得公國色天香真有待歸路
從公巾倒戴俗物汚人非所愛我公行向日邊歸此段
風流入圖繪

得酒字

宇文師獻

平生慕英游望公如山斗一見開心誠已落諸人後龍
門豈甄擇大小俱容受聯轡尋勝踐春風倚尊酒惟公

對江梅端若同志友土色洗塵沙幽姿出藜莠命客花
下坐相與沃醇酎非公無此客譬諸草木臭向晚入深
蒼蒼根歆甕牖始知水西頭臥梅勝臥柳有客三嘆息
此樹驚老醜一笑客誠癡萬法要經久竒卉如尤物過
眼不必有惠我終日香重來香在否但從此理悟那復
長搔首念公捧召節修名當不朽艤舟未忍去招尋訪
林藪中心甚虛明外慕厭紛糾杖履循古岸細話猶開
誘再拜誦公詩一洗芻豢口

得陶字

楊大光

蟠根寄荒絕，擢幹空樛樛。鄉來聞妙語，剪拂到兒曹。垂
老猶叵堪，開落幾徒勞。不謂勤杖屨，惠然排蓬蒿。尚能
領諸生，相就醉澄醪。真賴旁輝映，并覺標韻高。酒闌興
未已，分韻看揮毫。籍湜俱可人，冥搜爭過褒。乃知天地
間，一等為賢豪。橫飛與陸沉，亦各繫所遭。受命起窮邊，
國柄行當操。盡期如此花，曉夕幸甄陶。得備和羹用，寧
不出伊臯。百年幾春風，勿令心忉忉。

得彭字

于格

庭柯臥蒼虬閱世如聃彭朔風破檀蕊零露滋玉英江
空人響絕影落千丈清今代文章錄縉雲生齊明躍馬
覘春色觴客江上亭三嗅韻勝華霜霰飽曾經及時剝
其實可用佐八烹幸因輜軒使錫貢充廣庭王明儻子
燭和羹登筮劔

得澤字

僧寶印

江路歲崢嶸酸風更蕭瑟發興訪梅花主盟得詩伯孤

芳有餘妍初不帶脂澤香度竹籬短影搖谿水碧同時
飲中仙著我林下客春槽涕滴紅滿坐喧舉白澆胷獨
茗盃臭味曾不隔公今日邊去陛下正前席請看枝頭
春中有和羹實反騷試與提不礙心鐵石

得今字

楊凱

蘭亭久陳迹修竹空自陰龍山亦淒涼鮮花誰與簪英
遊曠千載盛事新梅林四海馮黎州未妨鐵石心提携
到諸子徧賞江之潯房亭姑射仙玉立何森森謝氏六

君子對飲香滿襟西郊訪老龍竒怪尤可欽宛然如先
生高臥歲月侵從茲飽薰風佳實共鼎鬻正味悅天下
妙用無古今去去好著鞭江南春已深

得作字

呂商隱

一樹知獨秀十里方出郭江流浩清冷露氣疑淒薄胡
為此行色疲馬外踴躍玄冥正擅令植物困搖落身心
縱未改佳意久已惡喜見南北枝粲然秀冰壑千林色
暉映百畝香磅礴首破春風荒獨傲清雪虐坐令芳信

傳芬菲到羣萼如一君子信茹連俱有託相期飲此意
浩蕩放杯酌更應護攀折嘉實須若若終收調鼎功傳
巖真可作持問縉雲老一尊笑相酢

得梅字

馮時行

霜朝馬蹄無纖埃錦城城西江之隈金蘭合香俱明來
白沙鱗鱗江水洄梅花傍江高崔嵬人言猶是王建栽
豪華過眼浮雲哉下馬酌酒聊徘徊飛英送香來酒杯
酒酣疾呼竹籬開走尋屋角如龍梅梅龍雖多此其魁

睡龍屈盤肘承肱風欺雪虐封蒼苔孫枝迸出誰胚胎
天公撫摩春為回慎勿變化隨風雷年年開花照尊壘
我欲結茅買芋煨與梅周旋送衰頹

得花字

呂凝之

出郭豈憚遠滿城無此花新枝開玉雪老樹臥龍蛇臨
水互葱蒨傍籬忽橫斜詩聲寫竒怪畫本出槎牙老子
晉彭澤諸公賈長沙不尋龍李盟來嗅霜露華杖履穿
茆舍壺觴倩酒家飢飡香馥郁醉藉影參差月白鴈成

字江清魚可又風流一時勝野意十倍加祇恐天上去
迹陳錦江涯歸來馬蹄疾驚飛滿林鷗

沈黎使君與客飲王建梅林分韻作詩過沉犀
以詩相示闕樹字令漢廣補之

樊漢廣

牆頭冉冉新陽露忽作玲瓏玉千樹老蛟偃蹇獨避人
卷回飛雪江皋暮何處鳴禽來好音四月枝垂起黃霧
推折霜餘初不懼笑看春光等閒度百年夢幻欲無言

吹落吹開豈風故時來薦鼎真偶爾小住疎籬非不遇
我知天地絕茫茫無為展轉獨多慮為花悽斷却回頭
爾亦微酸若難茹

得下字

施晉卿

郊原宿雨餘雪重雲垂野春信初動搖欲往豈無駕使
君早著鞭問路逢耕者深尋煙雨村共作詩酒社庭荒
得老樹氣象自儼雅一笑呼酒來大盆注老瓦最後看
枯株何意當大厦天矯待風雲有年天實假須知羹鼎

調嘉實名用捨我欲壽使君罇壘更傾瀉明朝得楚騷
健甚無屈賈君今有賜環詔落九天下蜀江雪浪來棹
趁舩人把留滯以諸生斯文要陶冶惟應郢中歌倡絕
和自寡更聞督熊兒夜賦燭餘地它年看無雙聲譽出
江夏却笑昌黎公阿買字能寫

賦成都碧鷄坊李氏石君

事見成都古今記中
蓋湖石之最大而奇

者著名
舊矣

孫松壽

造化小兒斲山骨幾年流落蛟龍窟太湖一碧浸玻

璿瀾吞浪吐窮奔突瑰竒未許困泥沙漂出江臯空
嶮岨清寒偃蹇如高人肯向蓬蒿念埋沒曩聞上苑
饒竒珍千形萬狀高嶙峋當年搜索困山海氊包席
裹車嶙嶙規模豈但肖五嶽氣象直欲凌三神一朝
戎馬窺城下例隨矢石荒荆榛憐君分落幽人手不
逐爾輩汙塵垢首陽寂寞伯夷清瀟湘冷落三閭瘦
李侯曾中飽雲夢得君不用斯瓊玖館之舊隱與周
旋竹士松賓三益友相看一洗名利心眉宇更清元

德秀君今幾世德未衰霜寒玉立癯而壽咄嗟世眼
多嗜好玩形忘理十八九竒章所蓄森琅玕名標甲
乙空紛然到漑竒礪高萃崱一擲徒為負進錢石君
于汝非不厚較其所得無何有願公世濟此君為不
朽

鴈詩

朱乘

八月新霜岸草枯數聲哀怨鴈未初憑君試向沙汀看

恐帶白奴二帝書

高宗皇帝聞之嘆曰
此人頗有愛君之心

彌牟鎮孔明八陣圖詩

王剛中

我稽八陣圖規模載方冊
竭來鎮西蜀夔門觀疊石
賦詩百數字字字究來歷
進涉漢川西彌牟鎮之北
平原列堆阜灘石同一式
細思作者意孔明有深策
高岸或為谷灘石存遺跡
江海變桑田平原猶可覓
故今兩處存千載必一得
再歌遂成篇當有智者識

題陳去非王摩詰嘉陵圖

王安中

干戈已暗大同殿管絃猶喧凝
碧池別寫嘉陵三百里

右丞心事欲誰知

邛州青霞嶂

青霞嶂與石城山相連

張愈

霧山環合自雲川，戶有清溪種玉田。
萬本桃花不知處，幾人曾得問秦年。

萬安驛

張縝

勁兵重作付匈奴，毆雀毆魚計自踈。
地入萬安知幾許，却憐此邑始回車。

續詠萬安驛明皇幸蜀至此嘆曰一安尚不可得況萬安乎

題柯敬仲畫

前人

予先世居隆州州治之後山石室翁守郡時
隆為陵州州事簡時來就吾家拾故紙背作
茅蘭竹木之屬所得頗多吾幼時尚收得數
紙今亦亡之丹丘生用文法作木竹而坡石
過之近又以新意作墨花甚妙從子悅有眉
山學官之行立為作此予愛而賦之

昔者老可守陵州守居北山吾故丘太守時來看山雨
每畫紙背成滄州老蒲松煙色過重揮霍陰崖交劔矛

百年離亂亡故物，敝篋江南誰復收。
新圖竇管枝葉修，使我不樂思昔侯。
碧鷄祠前杜宇叫，五女井上叢篁幽。
棠梨樹高青子落，碧花翠蔓紫牽牛。
揚雄無家不歸老，蠨蛸蟋蟀寒相求。
丹丘先生東海客，何以見我空山秋。
蕭條破墨作清潤，殘質刊落精英留。
陂陀重複分細草，山石縈紆生亂流。
眉山學官莫厭冷，言歸故鄉非遠遊。
石田茅屋儻可得，萬里欲上東吳舟。
百花潭深濯新錦，持報以比珊瑚鈎。

題商德符蜀山圖

前人

每愛商公寫蜀山蒼崖直下竹林間錦城雨後江沙白
劍閣霜餘木葉殷何處揚雄池盡墨誰家杜甫月臨關
釣鼈海上天空濶待得仙槎一往還

蜀人鎬夢良效楊補之掀篷圖一首

前人

錦屏山下花如錦却愛清江野水邊放筆豈能無直榦
掀篷方欲鬪清妍最憐半面歌歌扇更笑輕身障舞筵

君看上林千樹雪繁枝何處獨娟娟

題王庶山水

前人

蜀人偏愛蜀江山圖畫蒼茫咫尺間駟馬橋邊車蓋合
百花潭上釣舟閒亦知杜甫貧能賦應嘆揚雄老不還
花重錦官誰得見杜鵑啼處雨斑斑

題秋日蜀棠

前人

野棠青子來青鳥霜日清妍欲近人忽見嫣然紅數萼
劇憐秋色勝於春

酒肆

明晏鐸

半幅青帘柳外斜
甕頭春色泛桃花
遙思昔換金龜處
知是長安第幾家

詠柳邊驛前棕樹

劉成得

雲林秋盡葉齊凋
棕樹臨風翠羽搖
江上人家欲聽雨
故栽濃綠當芭蕉

毘橋兩渡

盧雍

橋斷毘江路
殘霞水底天
渡邊還有渡
莫怪急呼船

桂湖夜月

前人

月白湖光淨
波寒桂影繁
人間與天上
兩樹本同根

全蜀藝文志卷十九